

ԵՐԵԿՈՅԵԱՆ ԱՂՕԹՔ

Ո՛վ գթած Հայր, բարեխնամ արարիչը բոլոր արարածներուն. ընդունե՛ք թեզի ծառայողներուս այս պաղատանքը երեկոյեան այս ժամուն, դուն՝ որ առատօրէն քու բարի պարգեւներդ կու տաս բոլորին: Ողորմե՛, Տէ՛ր, ամբողջ աշխարհին եւ մանաւանդ քու սուրբ Եկեղեցիիդ. - Հիւանդներուն, վշտահարներուն, ճամբորդներուն, նաւորդներուն, խռատովանողներուն, ապաշխարողներուն եւ հանգուցեալ հոգիներուն. որովհետեւ դուն, ամենակա՛լ Տէր, գիտես մեր պէտքերն ու կարիքները՝ մեր խնդրածէն եւ գիտցածէն ալ աւելի: Որդիիդ եւ ամենասուրբ Հոգիիդ հետ միասին՝ թեզի՛ կը վայելեն փառքը, իշխանութիւնն ու պատիւը, այժմ եւ միշտ եւ յաւիտեանս յաւիտենից: Ամէն:

Շնորհակալութի՛ւն թեզի, իմ Տէրս եւ Աստուածս, կ'օրհնեմ եւ կը փառաւորեմ քու սուրբ անունդ, որ պահեցիր զիս՝ քու անարժան եւ մեղաւոր ծառայ [աղախինդ] այսօր, եւ խաղաղութեամբ հասցուցիր երեկոյեան այս ժամուն:

Եւ հիմա կ'աղաչե՛մ թեզի, իմ Տէրս եւ Աստուածս, դուն՝ որ ցերեկը ստեղծեցիր աշխատանքի համար եւ գիշերը՝ որպէսզի մեր տկար բնութիւնը հանգչի, այնպէս ըրէ՛ որ այժմ, ես՝ քու ծառայ [աղախինդ], ննջեմ մարմնով բայց արթուն մնամ հոգիով ու միտքով:

Իմ Տէրս եւ Աստուա՛ծս, ահա ես կը քնանամ եւ անկենդան դիակի պէս կը փռուիմ, եւ չեմ գիտեր թէ ե՛րբ ես ի՛նչպէս պիտի ելլեմ. ուստի հոգիս, մարմինս եւ իմ բոլոր պարագաներս քու անհուն ողորմութեանդ կը յանձնեմ:

Կը խնդրեմ որ քու ամենագոր Աջովդ կնքես այս տունն ու տեղը, իմ էլք եւ մուտքս, որպէսզի քու Աջիդ տակ կարենամ քնանալ ապահով եւ աներկիւղ, խաղաղութեամբ եւ առանց փորձանքի: Պահպանե՛ զիս հոգեկան թէ մարմնաւոր բոլոր թշնամիներէն, գիշերը շրջող պատուհասէն, գիշերային վախերէն, դիւական ցնորումներէն, աղտոտ խորհուրդներէն եւ զարհուրեցնող երեւումներէն:

Մաքրե՛ միտքս բոլոր ծուռ մտածումներէն, աղտոտ խորհուրդներէն եւ մեղքի ծնունդ տուող բոլոր գրեգիռներէն: Պահապան եւ վերակացո՛ւ կարգէ ինձի՝ քու յանցաւոր ծառայիդ [աղախինիդ]՝ երկնային զինուորներու բանակդ, իմ անձնական հրեշտակիս հետ միասին, ինչպէս նաեւ քու ամենայաղթ խաչիդ նշանը, ո՛վ Քրիստոս, որպէսզի անոնց պահպանութեամբ կարենամ ապահով եւ աներկիւղ ննջել այս գիշեր, եւ խաղաղութեամբ հասնիլ առաւօտուն, որպէսզի այն ատեն եւս փառաւորեմ թեզ՝ Հայր եւ Որդի եւ Սուրբ Հոգի, որո՛ւն կը վայելեն միշտ՝ փառքն ու երկրպագութիւնը, յաւիտեանս յաւիտենից. Ամէն:

Տէր իմ Աստուած, Տէր Բարերար, Դուն պահպանէ զիս այս գիշեր. տուր հօրս եւ մօրս կէանք երկար եւ երջանիկ հանգիստ օրեր: Քու սուրբ հրեշտակդ մեր մօտէն չի հեռանայ ամենեւին, այլ պահէ մեզ փորձանքներէն, արթնցնէ զուարթագին. Ամէն: